



**Partording Ni Partangiangan
Parningotan Panaonon Ni Tuhan Jesus**



**HKBP KISARAN KOTA
RESORT KISARAN**

Pinatomutomu ni : Pdt Budianto Sianturi

**PARTURE NI ACARA
PARTANGIANGAN PASSION
PAIHUTIHUT SITAONON NI TUHAN JESUS KRISTUS
PASSION I**

~~~~~ Pangaradeon diri / tangiang na hohom~~~~~

**Joujou Tu Parsaoran : U: Uluan ; H: HURIA**

**U :** Huria na hinophop ni Tuhanta, di bagasan unduk dohot serep ni rohanta naeng paihutihutonta barita panaonon ni Tuhan Jesus andorang so gantung do pe Ibana di hau parsilangi. Di partangiangan passion on naeng gorga tu bagasan rohanta hinahansit dohot hinabernit na tinaon ni Tuhanta i.

**H :** Nunga huparade rohangku paihutihut barita ni panaonon ni Tuhanki, anggiat lam huantusi pambahenan ni Tuhan i di ngolungkon.

**U :** Bidang pe laut lobi umbidang do holongNa, bagas pe laut lobi umbagas holongNa, timbo pe langit lobi tumimbo do asi ni roha ni Debata. Antong ta tanda ma si tobus nasa dosanta, asa unang marisuang panghophopNa i.

**H :** Puji ma Ibana ale tondingku, tung unang halupahon denggan ni basaNa.

**U :** Antong hamuna huriaNa, huarahon ma hita saluhutna paihutihut na masa andorang so tarpajal Jesus di hau silang i. Tapasiding ma angka pingkiran na boi mambahen dao rohanta paihutihut siak ni bagi na masa tu Jesus, asa anggiat holong roham tu na manghohop Ho. Marende ma hita...

**1. Marende No. 88: 1,4 “Jesusku Naung Manobus Ahu”**

✠ *Jesusku naung manobus ahu, sai naeng haholonganku Ho. Tu dolok Golgatha Ho lao nionjar ni holongMu do. Hupuji nasa asiMi, alai gumodang holongMi.*

✠ *Bagas uhirhon tu rohangku, panghophopMi humophop au. Tusi ma togu pingkiranku, guru di Ho sambing ma au. Hupuji nasa asiMi, alai gumodang holongMi.*

**2. Votum –Introitus–Tangiang :**

**(U=Uluan ; H=Huria ; Pr : Parompuan, Ba: Baoa)**

**U :** Marhitehite Goar ni Debata Ama dohot goar ni AnakNa Tuhan Jesus Kristus dohot Goar ni Tondi Parbadia, na manompa langit dohot tano on.

Amen! Tongon do angka sahitta diusung Ibana, jala angka pardangolanta diporsan. Ala ni pangalaosionta Ibana tartullang, binahen ni hajahatonta Ibana mabugang. Ampe tu Ibana pinsangpinsang parhitean ni hasonanganta, jala binahen ni bugangNa malum hita hilala. Haleluya! **Martangiang ma hita:** Ale Amanami Parasiroha na sumurung, Debata ni hatuaonnam. Huingot hami do di angka ari on panaonon dohot hamamate ni Tuhan Jesus Kristus, Tuhannami. Pahibul ma rohanami jala parbadia mamingkiri sude na tinaonNa i. ***Patandahon ma tu hami dosanami, asa diarsakhon rohanami dosanami i.*** Huhut asa hupompomi hami hisaphisap dohot sangkapsangkap ni rohanami na roa i, jala asa hupasaut hami lomo ni roha ni na manobus hami, asa martua hami sian i ro di saleleng ni lelengna. Sai patupa ma i di hami marhitehite Tuhan Jesus Kristus, Anak haholongan ni rohaM. Amen

### 3. Marende BE No. 83 : 1 “Na lao do Birubiru i”

✠ *Na lao do Birubiru i mamorsan angka dosa. Ni nasa hajolmaon i di benget ni rohana. Diporsan do sahitta i dilehon do DiriNa i. Tu tangan ni pamunu ditaoni do na bernit i. Ro di na tos hosaNa I, Didok : Naeng porsanonku.*

### 4. Barita Parjolo: Dibaritahon Jesus hinarjorbut ni Angka Naeng Masa

U :Alai lam torop do angka si ihuthon Jesus, ragam do angka tanda-tanda halongangan na mambehen lam sogo roha ni torop halak parise dohot siboto surat! Marjea ma hamu sibotosurat dohot Parise, hamu pangansi! Ai suman do hamu tu tanoman na hinapur, angka na denggan berengon sian duru, hape marisi holiholi ni na mate do dohot nasa na rotak! Pola didok hamu: Aut hami uju di ngolu ni angka ompunami, ndang tagamon dohot hami parsala di mudar ni angka panurirang i! Dibahen i, ida ma, Ahu marsuru tu hamu angka panurirang dohot parroha na tigor hape: Bunuonmuna jala parsilangknonmuna ma deba sian nasida, na deba linsinganmuna do di parguruanmuna jala leleanmuna sian huta tu huta. Dibunu ho do angka panurirang jala didangguri ho do angka na sinuru manopot ho. Nunga piga hali naeng papunguonku do nian angka anakmi, sobokkon pidong na papunguhon anakna tu toru ni habonghabongna; alai ndang dung olo hamu! Ai hudok ma tu hamu: Na so idaonmuna be Ahu olat ni on, paima dohononmuna: Pinasupasu ma na ro marhitehite Goar ni

Tuhan i! Jadi diarahon Jesus ma na sampuludua i jala didok ma tu nasida: nangkok ma hita tu Jerusalem, jala tulus ma tu Anak ni Jolma i sasudena, na tarsurat di buku ni angka panurirang, na mandok:

**H : *Ai pasahaton ma*** Anak ni Jolma i tu angka sintua ni malim dohot tu sibotosurat, ***gabe insahanna, leaanna jala tijuranna ma Ibana,*** ingkon marutang hosa, ***pola mate Ibana bunuonna, dungi pangoluonNa do Ibana muse di ari patoluhon.***

**U :** Dung i didapothon ina ni anak ni si Sebedeus rap dohot angka anakna i ma Ibana, disomba ma, laho pasahathon pangidoanna. Jadi ninna Jesus ma mandok ibana: Aha dipangido rohamu? Dung i didok ma tu Ibana: Loas ma hundul sogot anakku na dua on, na sada di siamunMu, na sada nari di hambirangMu, di harajaonMi! Alai ninna Jesus ma mangalusi: Ndang diboto hamu na pinangidomuna. Tung tarinum hamu ma siinumon na naeng inumonKu (jala tarparidi hamu ma paridion siparidionKu)? Jadi didok nasida ma: Tarbahen hami do! Dung i didok ma tu nasida: Tutu nian, inumonmuna do siinumonKi; jala paridihononmuna do paridion siparidihononKi; alai ndang guru di Ahu na mambahen hundul di siamunKu dohot di hambirangKu. Damang i do padirihon i tu angka panahatanna i. Alai ndang diantusi angka sisean i agia otik na hinatahon ni Tuhan Jesus. Buni do hata i sian rohanasida, ndang diboto nasida na hinatahonNa i.

**H :*Jadi bobonosan situtu ma rohanasida. Dung i diarahon si Petrus ma Ibana, disaritai ma, ninna do: Asi ma roha ni Debata di Ho Tuhan. Unang ma songgop i tu Ho.***

**U :** Alai humusor ma anggo Ibana mandok tu si Petrus: Laho ma ne ho bolis. Gasip do Ho di Ahu, ai ndang diparrohahon ho angka na di Debata, angka na di jolma do. Dung i didok Jesus ma tu angka siseanNa: Nasa na giot mangihuthon Ahu, disoadahon ma dirina, diporsan ma silang na tu ibana; diihuthon ma Ahu. *Ai na naeng paluahon hosana, mangagohonsa do; alai na agoan hosa alani Ahu, ido na jumpangan.* Ai aha ma antong gunana di jolma nang liat portibi on diomo, anggo mago do tondina? Aha ma tarlehon jolma bahen tobus ni tondina? Ai na ro ma sogot Anak ni jolma i di bagasan hasangapon ni AmaNa rap dohot angka surusuruanNa, dung i balosonNa ma tu ganup, hombar tu na niulana.

## **5. Koor :**

## 6. Marende, No. 182: 3 “Tu JoloM O Debatangku”

✠ Sai jotjot do hutadingkon, dalanMi na tigor i. Kristen au hape hutondong, dalan hamagoan i.

## 7. Barita Paduahon : “Dimiahi si Maria Pat ni Jesus”

U : Dung i onom ari nari asa dapot pesta Paska i, sahat ma Jesus tu huta Betania, na niinganen ni si Lassarus, na sinunggul ni Jesus sian na mate. Jadi dipauli nasida ma disi panganon ujuan di Ibana : si Marta do manghobasi, si Lassarus ma sada donganna mangen disi.

**Pr: Gabe dibuat si Maria ma sahati miak nardus na arga na so marsaor, dimiahi ma pat ni Jesus, obukna ma dibahen mangalapu. Jadi digohi uap ni miak i ma bagas i.**

U : Jadi sada sian angka siseanna, si Judas Iskariot na naeng manjehehon Ibana, mandok: Boasa so ginadis miak na arga tolu ratus hupang, bahen silehonlehon nian di angka na pogos.

**Ba: Alai ndada na pogos sinarihonna, umbahen na didok ibana songoni, panangko do ibana tahe, diusung do asiasi ni halak, ai tu ibana dipasahat puro i.**

U : Dung i ninna Jesus ma: Pasombu ma Ibana, ai diparade do i hira tu ari hatatanomHi. Ai tongtong adong na pogos ditongatongamuna jala asal ma olo hamu, tarpatongon hamu do na denggan tu nasida: Alai anggo Ahu ndang manongtong dihamuna. Intap na tarbahensa do na niulana i, na manjoloani do ibana mamiahi pamatangku songon di na mananom. Situtu do hatangkon tu hamu: manang didia liat portibion dijamitahon muse Barita na uli on, hatahononna do binahenna i gabe baritana. Dung i torang ni ari na i dibege halak na torop na ro tu pesta i na naeng ro ma Jesus tu Jerusalem, jadi dibuat nasida ma angka maremare, lao manomunomu Ibana huhut manjoujouhon; **Hosianna! Pinasupasu ma na ro marhitehite goar ni Tuhan i, Raja ni Israel!** Dungi dapot Jesus ma halode sada, ima dihunduli. Hombar tu na tarsurat: Unang ho mabiar boru Sion, ida ma rajam do na ro, marsihundul di anak ni halode, dohot di anak ni halode inaina. **Jadi deba sian natorop i mandok: Orai ma antong angka siseanmi, Guru.** Alai ninna ma mangalusi: Hudok ma di hamu: aut mauhom nasida, manjoujou ma angka batu. Alai dibongoti si bolis do si Judas na margoar Iskariot, sahalak sian sampuludua i, gabe laho ma ibana martuptup dohot angka

sintua ni malim rap dohot angka panunggane i manang dia dalanna pasahathon Jesus tu nasida. Jadi sian las ni roha nasida marpadan ma nasida mengalehon hepeng tu ibana. Di oloi si Judas ma i, jadi dilului ma tingki na une pasahathon Ibana so sian pamotoan ni na torop i.

## **8. Koor :**

### **9. Marende No. 711: 3 “Songon Ursa Na Binuru”**

✠ *TungkiMi Ale tondingku, tung beasa rusak ho ? Sai haposi Debatamu, ndang tadinghononNa ho. Pujionku do muse Tuhan Debata dope, Hatuaon ni bohingku na tongtong naeng haposanmu.*

### **10. Barita Patoluhon: Jesus Tu Huta Jerusalem**

U : Dipansang sintua ni malim dohot angka Parise ma rapot godang, didok nasida ma: Aha ma bahenonta? Ai lan do tanda dibahen halak i! Molo itapasombu Ibana, porsea ma halak saluhutna di Ibana, gabe ro ma halak Rom mangarampas tanonta dohot bangsonta.

**Ba:** *Alai hehe ma sada sian nasida ima si Kayapas, sintua ni malim di na sataon i, didok ma tu nasida: Na hurang roha do hamu!*

**Pr:** *Ndang dipinghiri rohamuna, denggan do mate sada halak humophop natorop i, unang laho mago sandok bangso i.*

U : Alai ndang sian rohana sandiri dihatahon i, ala sintua ni malim ibana di na sataon i umbahen na disurirangkon, na naeng mate ma Jesus humophop bangso. Alai tahe, ndada holan manghophop bangso i, alai naeng papunguonna angka anak ni Debata, angka na marserak dope, laho pasadahon. Asa olat ni na sadari i martuptup ma nasida laho mamusa Ibana. Alai didok nasida ma: Unang ma dipesta i, sotung guntur na torop i!

### **11. Marende No. 719 : 1 “Hubege Soaram O Jesus”**

✠ *Hubege soaraM O Jesus, hubege soaraM O Jesus. Hubege soaraM O Jesus na manjouhon ihuthon ma Au. Togu au Jesus Tuhanhu, iringiring ma langkangku. Patuduhon ma dalanMu, asa unang, unang lilu au.*

### **12. Barita Paopathon : Diburi Tuhan Jesus Pat ni angka SiseanNa**

U : Alai di ari parhobason parjolo ni pesta Paska i didapothon sisean i ma Jesus, angka ninna ma: Tu dia ma patureonnami di Ho panganon Paska i, dipangido roham? Gabe didok ma: Laho ma hamu tu huta i manopot si Anu, dok hamu ma tu ibana: Tona ni Guru i, na dapot ne ma tingkingku,

di ho ma ahu sorang laho mangan Paska i dohot siseanKu. Jadi saut ma disuru Ibana siseanna dua halak jala didok ma tu nasida: Molo laho hamu tu huta, pajumpang ma hamu disi dohot sada halak na mangusung aek sahudon, ibana ma ihuthon hamu. Tu ibana ma dok hamu; Didia do bilut inganan, asa disi dipangan hami Paska i? Jadi patuduhononna ma tu hamu bilut parginjang sada, na lambas na tipak hinembangan, disi ma pature hamu di hita. Jadi borhat ma siseanna, dibongoti ma huta i, jadi jumpang nasida ma tutu songon na nidokNa i, dipature ma Paska i. Asa dung bot ari, ro ma Jesus dohot na sampuludua i. Asa dung dapot tingkina, hundul ma Ibana rap dohot angka apostel. Dung i ninna ma mandok nasida: Mansai masihol rohangku naeng mangan birubiru paska on rap dohot hamu tagan so songgop dope sitaononki. Ai hudok ma di hamu “na so tupa panganonku be i; ia so dapot hagogokna i di harajaon ni Debata”. Jadi di na mangan nasida, hehe ma Jesus sian na mangan i, ditanggali ma ulosNa, dibuat ma basahan ditapolhon tu Ibana. Dohot basahanNa na tinapolhonNa i. Dung i sahat ma Ibana tu si Simon Petrus jadi didok ma mandok Ibana:

***Pr: Tung Ho ma ale Tuhan, mamuri pathu?***

U : Dung i ninna Jesus ma mangalusi ibana; Nandang diantusi ho pambahenanKu na tu ho anggo nuaeng, muse pe botoonmu i. ***Dung i didok si Petrus ma tu Ibana: Matua tano on, ndang burionMu pathu!*** Dung i ninna Jesus ma mangalusi Ibana: Molo so burionKu ho, ndang partohap ho di Ahu.

***Ba: Dung i ninna si Simon ma: Ale Tuhan, unang ma holan pathu, dohot ma tangan dohot ulungku.***

U : Gabe didok Jesus ma tu ibana: Halak naung maridi i, ndang be burion; ai nunga sude ibana ias. Naung ias do anggo hamu, alai ndang luhut hamu. Ai ditanda do sipasahat Ibana, umbahen na didok: Nandang saluhut hamu ias. Asa dung diburi Jesus pat nasida, dipangke ma muse ulosNa, hundul ma Ibana, didok: Ai diantusi hamu do pambaenKi tu hamu? Digoar hamu do Ahu Guru dohot Tuhan, jadi ture do pandokmuna disi, ai i do, Ahu tutu. Asa molo Ahu Tuhan jala Gurumuna mamuri patmuna, tama ma nang hamu masiburian pat! Ai sitiruon do hulehon tu hamu, asa dibahen hamu songon na hubahen i tu hamu! Na tutu situtu do na hudok tu hamu: Nandang umbalga anaksomang sian indukna, ndang sumurung

suruan sian na marsuru ibana. Molo diboto hamu i, martua ma hamu mangulahonsa! Jadi di na mangan i nasida, ninna Jesus ma: situtu do na hudok on tu hamu. Sada sian hamu naeng pasahathon Ahu! Dung i marsak situtu ma nasida, gabe dipandok be ma tu Ibana: ***Nda tung ahu i Tuhan?*** Alai ninna ma mangalusi; Ia i na rap dohot Ahu manurdukhon tanganna tu paringkauan, ido na pasahathon Ahu! Tong do nian ujung ni Anak ni jolma i! Tagonan unang ma sanga tubu ibana tu hasiangan on!

**13. Koor :**

**14. Marende, No. 162: 3,6 “O Debata Mansai Balga”**

✠ *I pe tu Ho na ma au ro, sai unang tulak ahu.*

*Paombun ma O Debata, rimasMu mida ahu.*

✠ *Ajari au na jat padao, paias ma rohangku.*

*Jorai au on di ngolungkon tu surgo tait rohangku.*

**15. Jamita**

**16. Marende BE No. 82: 1, 2 ”Jesusku, Tu BugangMu” (Pelean)**

✠ *Jesusku, tu bugangMu, ro marsomba rohangkon.*

*Sai tarpuji, sai tarpuji, na pamalum tondingkon.*

✠ *Tung di patMu, o Jesusku, solsolanku rohangki.*

*Tangisanku na tinaonMu, ala jat ni rohangki.*

**17. Panutup: Tangiang & Pasupasu. (Amen, Amen, Amen)**



**PARTURE NI ACARA  
PARTANGIANGAN PASSION  
PAIHUTIHUT SITAONON NI TUHAN JESUS KRISTUS  
PASSION II**

---

**Joujou Tu Parsaoran :**

U: Hamu angka dongan huria ni Tuhanta Jesus Kristus! Di tingki on tabongoti ma Partangiangan borngin Passion II, parningotan panaonon ni Tuhanta Jesus Kristus! Tapaihut ma dibagasan rohanta.

~~~~~ **Pangaradeon diri / tangiang na hohom** ~~~~~

1. Marende BE No. 76: 1, 2 “Sada Nama Sangkap”

✠ *Sada nama sangkap ni rohangku di sandok portibi on.*

Ndang tagamon na so las rohangku, molo jumpang au inon.

Naeng ma sai ingoton ni rohangku, na binaen ni Jesus tu tondingku.

Uju pinorsanNa i, saluhutna dosangki..

✠ *Ingon sai Ibana ingotonku, uju na tarpajal i.*

Tu hau pinarsilang ginantungkon, sai mabaor mudarNa i.

Ai humophop au ditaon uasNa, asa dohot au muse upaNa.

Ai ditatap do au on, di pandokNa: “Nunga sun !”

2. Votum –Introitus–Tangiang :

(U=Uluan ; H=Huria ; Ba.=Baoa, Pr= Parompuan)

U: Marhitehite Goar ni Debata Ama dohot goar ni AnakNa Tuhan Jesus Kristus dohot goar ni Tondi Parbadia. **Amen.** Tabereng ma induk ni haporseaon i jala na paujunghonsa, ima Jesus na manaonhon sitaonon i, singkat ni las ni roha tohapna i hian, so dietong i hailaon, gabe hundul di siamun ni habangsa ni Debata: Paingotingot hamu ma Ibana, na manaon paralloan sisongon i dompak Ibana sian angka pardosa asa unang marnaloja hamu, unang mandate tondi muna! Haleluya. **Martangiang ma hita**, Ale Tuhan Debata, Amanami na di Banua Ginjang! Asi ma rohaM di hami halak na gale on. Di ida Ho na gogo do musu nami, sai talu do hami dibahen, ala ni hagaleon nami. Dibahen i hupangido hami tu Ho: Sai pargogoi jala pamonang ma hami maralohon musu i marhite panaonon ni Anak haholongan ni rohaM, Tuhan Jesus Kristus. **Amen**

3. Koor :

4. Marende BE No. 76: 1, 2 “Sada Nama Sangkap”

✠ *Sai ingoton ni rohangku, Hansit naung di taon Tuhanku,
Uju i di Golgata.*

✠ *Na so dung adong salaNa,
Gabe ampe tu Ibana, dosa ni portibi on.*

5. Barita Palimahon: Judas manjehehon Jesus

U: Alai adong ma sada sian angka siseanna i, na hundul jumonok tu Ibana haholongan ni Jesus i. Ima dihilap si Petrus jadi ninna ma mandok ibana: Sungkun ma, ise na nidokNa i. ***Jadi dipajonok ma tu lambung ni Jesus mandok tu Ibana: Tuhan, ise i?*** Gabe dialusi Jesus ma: Ia tusi hulehon na santopik na husornophon on, ima ibana! Jadi disornophon ma santopik, dilehon ma tu si Judas Iskariot, anak ni si Simon. Jadi dung dibondut i, dibongoti sibolis i ma ibana. Dung i didok Jesus ma tu ibana: Humatop ma ulahon siulaonmu! Asa dung dijalo si Judas na santopik i, pintor laho do Ibana tu balian, alai borngin ma uju i.” Jadi di na mangan i nasida, dihindat Jesus ma roti, dipasupasu ma, diponggoli ma jala diparlehon ma tu angka siseanNa. Huhut ma didok: “Jalo hamu, pangan ma, dagingKu do on”, na nilehon humophop hamu. Ula hamu ma i bahen parningotanmuna di Ahu. Dung sun nasida mangan, dihindat ma panginuman, didok ma mauliate, dilehon ma tu nasida. Huhut ma didok: Ia panginuman on, padan na imbaru do i marhitehite mudarHu, na durus humophop hamu. Sude hamu manginum sian i. Alai hudok ma tu hamu: na so tupa be inumonKu olat ni on sian parbue ni hau anggur i sahat ro di ari sogot: Disi ma inumonKu na imbaru rap dohot hamu di harajaon ni Damang.

6. Koor :

7. Marende No. 152 : 1 “Jesus Na Mamorsan”

✠ *Jesus na mamorsan dosa ni portibi on pangolu hami. Jesus na mamorsan dosa ni portibi on pangolu hami. Jesus na mamorsan dosa ni portibi on, sai pasonang hami. Amen, Amen, Amen*

8. Barita Paonomhon: Jesus di Getsemane

U: Jadi dung diendehon nasida endeende pujipujian i, ruar ma nasida tu dolok Jetun. Disi ma didok Jesus tu nasida: saluhut do hamu naeng targasip mida Ahu di na saborngin on. Ai na tarsurat do: Lombutanku ma Parmahan i, gabe marserak ma birubiru na sapunguan i. Alai ninna si

Petrus ma mangalusi Ibana: Agia sude nasida targasip mida Ho, anggo ahu, na so tupa targasip. Alai ninna Jesus ma mandok Ibana: “O Simon, Simon nunga dipangido sibolis naeng segeonna hamu songon dahanon. Alai Ahu do manangiangkon ho, unang mintop haporseaonmi. Jadi dung mulak sogot roham, pargogoi ma roha ni angka hahaanggim!” Alai ninna si Petrus ma mandok ibana: “Tuhan, na hobas do ahu mandongani Ho tu hurungan, nang tu hamatean pe!” Alai ninna Jesus ma: “Hudok ma tu ho, Petrus: Ndang martahuak manuk saborngin on; so jolo tolu hali soadahononmu na so tinandam Ahu. Dung i sahat ma Jesus rap dohot nasida tu porlak sada margoar Getsemane. Jadi didok ma tu angka sisean i: “Hundul ma hamu jolo dison saleleng disan Ahu martangiang.” Dung i ditogihon ma si Petrus dohot anak ni si Sebedeus na dua i gabe marsak situtu ma Ibana jala bobonosan. Jadi didok ma tu nasida: “Mansai marsak situtu do rohangKu, hira na mate do. Dison ma hamu dungo rap dohot Ahu.” Dungi laho ma Ibana saotik tu jolo, dipatungkap ma bohiNa tu tano martangiang, ninna ma: “Ale Amang, namun na tarbahen salpuhon ma siinumon on sian Ahu! Alai tahe, unang marguru tu rohangKu, rohaM do!” Dungi mulak ma Ibana tu angka siseanNa jala tarpodom do nasida didapot, jadi didok ma tu si Petrus: “Ndang margogo hamu hape dungo rap dohot Ahu nanggo sangombas? Dungo ma hamu jala martangiang asa unang hamu bongot tu pangunjunan, ai na girgir do nian tondi i, alai gale do ia daging.” Dungi laho ma Ibana paduahalihon martangiang ninna ma: “Ale Amang, molo na so tarbahen salpu on, nda ingkon huinum, sai saut ma lomo ni rohaM!” Dung i ro i Ibana, tarpodom nasida didapot, ai mansai dokdok salibonasida. Jadi ditadingkon ma laho martangiang patoluhalihon mandok hata ondeng. Dung i didapothon ma muse angka siseanNa jadi didok ma tu nasida:” Datdatanmuna dope modom dohot maradian? Nunga dapot tingkina nuaeng, sahat ma Anak ni jolma i tu tangan ni pardosa. Hehe ma hamu, laho ma hita! Ndi! Nunga ro na pasahathon Ahu!”

9. Marende, No. 249: 1 “Ngot Ma Ho, O Tondingki”

✠ *Ngot ma ho, o tondingki dungo martangiang. Asa unang musu i, tole so tinagam. Bisuk ni setan i, do manait tu dosa lan na bonar roha.*

10. Barita Papituhon: Haroro Ni Angka Soldadu

U : Alai diboto si Judas siparjehe i do inganan i, ai jotjot do marpungu Jesus tusi dohot angka siseanNa. Ia si Judas diarahon ma angka soldadu dohot angka naposo ni sintua ni malim, didapothon ma tusi mantat sulusulu, palito dohot sinjata. Diboto Jesus do saluhut na naeng songgop tu Ibana, jala ruar ma Ibana, didok ma tu nasida: “Ise do na jinalahanmuna i?” Gabe ninna nasida ma mangalusi Ibana.

H : ***Gabe ninna nasida ma mangalusi Ibana: “Jesus halak Nasaret i do!”***

U : Dung i ninna Jesus ma mangalusi nasida: “Ahu do i!” Alai dohot do si Judas si parjehe i jongjong di lambungnasida. Asa dung didok tu nasida: “Ahu do i”, sumurut ma nasida, angka martinggangan ma tu tano. Dung i diulahi ma manungkun nasida: “Ise do na niluluanmuna?” Jadi didok nasida ma:

H : ***“Jesus, halak Nasaret i do!”***

U : Dung i didok Jesus ma: “Ahu do i! Asa molo Ahu dilului hamu, loas ma laho angka on! Ai naeng do jumpang na nidokna i: Ndang adong na mago hubahen agia sada sian angka na nilehonMi tu Ahu.” Alai nunga dipabotohon parjehe i hian partinandaan tu nasida, ai didok do, “ia i na huumma, Ibana ma i, i ma tangkup hamu!” Asa pintor didapothon ma Jesus, didok ma: ***“Tabi di Ho, Guru!” Laos diumma.*** Alai ninna Jesus ma mandok Ibana: “Marhua ho tuson anggia? O Judas, pangummaon do hape dibahen ho, pasahathon Anak ni Jolma i? “Dungi ro ma nasida, dilaluhon ma tangan nasida tu Jesus manangkup Ibana. Dung i, adong ma sada sian nasida angka dongan ni Jesus mangalaluhon tanganna, disintak ma podangna, ditampulhon ma tu naposo ni sintua ni malim sahalak, dipisikhon ma pinggolna. Jadi didok Jesus ma tu ibana: “Pasarung podangmi, ai na manintak podang, mago ma bahenon ni podang! Ai na so tarbahen Ahu do di roham mangido sian Damang asa dipadiri di Ahu saonari lobi sian sampuludua loksa surusuruan? Alai songon dia ma disi saut hata ni surat i na mandok “Ingkon masa do songon i?Uju i ma didok Jesus tu angka na torop i: Hira na dompak panamun do hamu hehe, marpodang jala marlombutlombut manangkup Ahu. Ariari do Ahu nian hundul mangajari di Bagas Joro, so adong ditangkup hamu Ahu.

H : Alai na masa do sudena on, asa jumpang hata ni angka panurirang i. Dung i ditadingkon saluhut sisean i ma Ibana laho maporus.

11. Koor :

12. Marende BE. No. 83: 4 “ Na Lao Do birubiru”

✠ *Saleleng na mangolu au, naeng ingotonku Jesus. Sude na binaenMi di au, hataM naeng hupatulus. Ho naeng haholonganku do, huhut ihuthononku Ho di dalan hangoluan. Tung ingkon Ho, nampuna ahu, mangolu manang mate au. Sai Ho do tioponku*

13. Barita Pauluhon : Jesus di Jolo ni Sintua ni Malim

U : Jadi bongot ma ibana rap dohot Jesus tu alaman ni malim i. Alai disungkun sintua ni malim i ma Jesus taringot tu angka siseanNa dohot taringot tu podaNa i. Jadi dialusi Jesus ma ibana ninna ma: “Patar do hatangKi dihatoropan. Na tongtong do Ahu mangajari na sailaon dibagasan parguruan nang dibagas joro pe, parpunguan ni saluhut halak Jahudi. Ndang adong manang aha huhatahon marsibuni. Boasa Ahu disungkun ho? Nasida naung umbege hatangKi, i ma sungkun! Ai diboto nasida do na huhatahon i.” Dung didok Jesus songon i, Dipastap sada oppas na jongjong disi ma Ibana, huhut ma didok: “Songon pangalusiM tu sintua ni malim i?

Pr :Dung i ninna Jesus ma mangalusi ibana: “Ia na hurang na hudok, hajongjonghon na hurang; alai anggo na hona do, boasa pastaponmu Ahu? Asa disuru si Hannas ma Ibana naung tinali i tu sintua ni malim si Kayapas, disi do marpungu siboto surat dohot sintua ni natorop.

U : Alai anggo angka sintua ni malim ro di sandok rapot godang mangalului panindangion gapgap dompak Jesus, na tuk mambahen Ibana marutang hosa. Alai nang pe hehe torop sitindangi gapgap ndang adong jumpangsa na tau mambahen Ibana uhumon. Alai parpudi ro ma dua halak ninna do: “Didok halak on: Tarbahen Ahu do mangalohai joro ni Debata jala pajongjonghoni sumuang di bagasan tolu ari. ”Dung i hehe ma sintua ni malim i, mandok tu Ibana:“Ndang alusanMu na hinatindangkonnasida dompak Ho?” Alai sai hohom do anggo Jesus. Dung i dipangkulingi sintua ni malim i ma Ibana: ”Hupatolon ma Ho tu Debata Siparngolu i, asa dipaboa Ho tu hami manang na tutu Ho,

Kristus, Anak ni Debata!” Dung i didok Jesus ma tu ibana: “Songon nidokmi ma tutu! Alai hudok ma tu hamu: “Olat ni on ma idaonmuna Anak ni jolma i, hundul di siamun ni hagagoon jala ro di atas ombun ni langit.” Gabe diribakhon sintua ni malim ma paheanna mandok:

Pr : “Na mangaleai Debata do Ibana! Pola luluan dope sitindangi? Nunga dibege hamu pangaleaina i! Beha do dirohamu? *Ingkon marutang hosa ma Ibana!*”

U : Jadi ditijuri nasida ma bohiNa, na deba manompuk, na deba mangalingsingi huhut mandok: “Surirangi hami, Kristus, ise do na mamunu Ho?” Alai sai mangihut do si Petrus mandaodao sahat tu alaman ni sintua ni malim i. Laos bongot ma ibana tu bagasan, laho hundul tusi rap dohot angka naposo marnida ujungna. Jadi didapothon sada parompuan ma ibana mandok: Dohot do ho dongan ni Jesus, na sian Galilea i!

U : Jadi disoadahon ma di jolonasida saluhutna, ninna ma:

Ba : *Ndang huboto na nidokmi!*

U : Dung i di na naeng haruar ibana, diida parompuan na asing ma ibana, didok ma tu angka na disini: On do sada dongan ni Jesus na sian Nasaret! Jadi diulahi ma mansoadahon, pola manolon:

Ba : *Tung na so hutanda do Halak i! Ndang hutanda Ibana, inang!*

U : Alai dung satongkin nari, didapothon angka na jongjong disi ma si Petrus mandok: Sintong tahe, dohot do ho sada sian nasida, ai pangkulingmi do patandahon ho! Dung i dipambuburahon ma dirina huhut manolonolon:

Pr : *Tung na so hutanda do Halak i, ndang na tutu i, amang!*

U : Jadi pintor martahuak ma manuk. Jadi diingot si Petrus ma na hinatahon ni Jesus tu ibana: Tolu hali soadahononmu Ahu, tagan so martahuak dope manuk. Dung i laho ma si Petrus tu balian tumatangis situtu.

14. Koor :

15. Marende No. 81: 2 “Jesus mual ni ngolungku”

✠ *Haleaon, insakinsak, reherehe tijur pe. Tali dohot pastappastap tung ditaonhon Ho sude. Paluahon au na pogos, sian tangan ni sibolis Alani hupuji Ho, tung marribu hali do.*

16. Jamita :

**17. Marende BE No. 84: 1 "Aut Na Ginorga Tu Rohangku"
(Pelea)**

✠ *Aut na ginorga tu rohangku, bohiM di na lao mate Ho
Aut na huingot o Tuhanku, tongtong pangkophopMi di au
Ai Ho do paluahon ahu, dosangku do pinorsanMi
Didaoni Ho parsahitonku, martua au binahen ni i.*

18. Panutup: Tangiang & Pasupasu. (Amen, Amen, Amen)

**PARTURE NI ACARA
PARTANGIANGAN PASSION
PAIHUTIHUT SITAONON NI TUHAN JESUS KRISTUS
PASSION III**

Joujou Tu Parsaoran :

U : Huria ni Tuhanta! Dibagasan serep dohot unduk ni roha tu Debata, tahalashon ma parsauranta. Parpunguanta sadari on ma Passion III. Haleaon, insakinsak, reherehe, tijur, tali dohot pastappastap, ditaon Ibana. Alai ndada holan i, ingkon sahat do Ibana tu hau pinorsilang, asa sae sude utang ni dosanta.

H : Hita do tama manaon i. Ai ala ni pangalaosionku do Ibana tartullang, jala ala ni hajahatongku do Ibana mabugang.

U : Antong, pabulus ma rohanta mangendehon, Jesus mual ni ngolungku sipangolu tondingki. Marende ma hita:

~~~~~ **Pangaradeon diri / tangiang na hohom** ~~~~~

**1. Marende No. 81: 2 “Jesus mual ni ngolungku”**

✠ *Jesus mual ni ngolungku, sipangolu tondingki. Ai dibunu Ho musungku, i ma hamatean i. Ho manaoni hamagoan, patupahon hangoluan. Alani hupuji Ho, tung marribu hali do*

✠ *Haleaon, insakinsak, reherehe tijur pe. Tali dohot pastappastap tung ditaonhon Ho sude. Paluahon au na pogos, sian tangan ni sibolis Alani hupuji Ho, tung marribu hali do.*

**2. Barita Pasiathon : Jesus di Jolo ni si Latus**

U : Asa ditogihon nasida ma Jesus tu jolo ni si Kayapas tu kantor. Alai sogot ma i manogot i. Nandang na bongot anggo nasida tu kantor asa unang tarsubang nasida laho manganhon Paska i. Gabe ruar ma si Latus mandapothon nasida, didok ma: Pangaluan dia do diboan hamu dompak halak on? Dungi ninna nasida ma mangalusi: Aut unang sibahen na jahat halak on, ndang tagamon pasahatonnami Ibana tu ho. Gabe didok si Latus ma mandok nasida: Boan hamu ma Ibana, uhum hamu ma Ibana marguru tu adاتمuna. Alai ninna angka Jahudi ma mandok ibana: Nandang jadi pusaonnami manang ise. Jadi dialuhon nasida ma Ibana, ninna ma:



**Ba :Na dapot hami do on pabalikbalikhon bangsonami jala mangorai mangalehon guguan tu Kesar i, dipandok, Raja Kristus do Ibana.**

U : Jadi dibongoti si Latus muse kantorna, dijou ma Jesus, didok ma tu Ibana: Atehe, Ho do Raja ni Jahudi? Ro ma alus ni Jesus: “Na sian roham do na nidokmi, manang na nidok ni halak do i tu ho taringot tu Ahu?”

**Pr : Gabe dialusi si Latus ma mandok: Bangsomi dohot angka sintua ni malim i do pasahathon Ho tu ahu. Aha do na binahenmu?**

U : Jadi dialusi Jesus ma: Ndang sian portibi on harajaonKu, aut sian portibion harajaonKu, ndang tarbahren so mangalo angka naposongKu asa unang sahat Ahu tu tangan ni angka Jahudi. Alai ndang sisongoni harajaonKi. Dungi ninna si Latus ma mandok Ibana: Asa Raja do Ho? Jadi ninna Jesus ma mangalusi: “Songon na nidokmi ma tutu, Raja do Ahu! Umbahen na tubu Ahu jala umbahen na ro Ahu tu portibi on, asa huhatindangkon hasintongan i. Ganup na sian hasintongan i, tangihonon ni i do soarangKu.” Ninna si Latus ma mandok Ibana: “Aha ma i hasintongan i?” Jadi dung didok songoni, ruar ma ibana muse manopot angka Jahudi mandok tu nasida: “Ndang jumpang ahu manang dia salana.” Dungi ditogu si Latus ma Jesus, didokkon ma linsinganna. Jadi didandani angka soldadu ma sungsang duri bahen tumpal, diampehon ma tu uluNa. Baju dapdap ma dialithon tu dagingNa. Dungi ro ma nasida tu joloNa mandok: Tabi di Ho ale Raja ni Jahudi! Laos dipastapi ma Ibana. Dungi ruar ma muse si Latus, didok ma tu angka Jahudi: Ida hamu ma, hutogihon do Ibana tu jolomuna asa diboto hamu na so adong jumpang ahu salana. Laos ruar ma Jesus manjujung sungsang duri jala marbaju dapdap. Jadi didok si Latus ma tu nasida:Ida hamu majolma i! Asa dung diida sintua ni malim dohot angka naposo Ibana, dijouhon nasida ma:

**H : Parsilangkon, Parsilangkon ma Ibana:**

U : Boan hamu ma Ibana, parsilangkon hamu ma; ai ndang jumpang ahu salana. Gabe dialusi Jahudi ma ibana, ninna ma:

**H : Padao, padao ma i; Parsilangkon ma Ibana!**

U : Dungi didok si Latus ma tu nasida: Parsilangkononku ma Rajamuna? Jadi dialusi angka sintua ni malim ma: Ndang adong rajanami dungkon ni Kesar i. Marguru tu patiknami ingkon marutang hosa Ibana, ai dibahren

do diriNa anak ni Debata. Umbege i si Latus, lam ganda ma biarna. Dungi diulahi muse tu kantorna, didok ma tu Jesus: “Sian dia do Ho?” Alai ndang dialusi Jesus ibana. Dung i didok si Latus ma tu Ibana: “Ndang angkupanMu ahu manghatai? Ndang diboto Ho marhuaso ahu paluahon Ho jala marhuaso parsilangkon Ho?” Jadi dialusi Jesus ma: “Ndang adong huasom mangago Ahu, aut unang ni lehon i tu ho sian ginjang.” Dibahen i gumodang do dosa ni na pasahathon Ahu tu ho. Jadi olat ni i ma dilului si Latus dalam paluahon Ibana. Alai manjujui ma angka Jahudi, ninna do :

***H : Molo dipahua ho on, ndang aleale ni Kesar ho! Ai na mangalo Kesar i do ganup na mambahen dirina gabe raja.***

U : Asa dung dibege si Latus hata i, ditogihon ma Jesus haruar, laos hundul Ibana di habangsa paruhuman i na diinganan na margoar: Pantar batu alai anggo di hata Heber: Gabbata. Ima na masa di ari parhobasan Paska, mareak hos ni ari. Asa dung diida si Latus, na so marguna hatana, lam ganda tahe gaorna, dibuat ma aek mamuri tanganna dijolo ni natorop i huhut mandok: Lias do ahu sian mudar ni on, hamu do na sari disi! Dungi ninna sude natorop i ma:

***H : Marsapata tu hami dohot ianakkonnami ma mudarNa i!***

U : Alai peam do dipalua panguhum i di pesta i sada halak na tarhurung, marguru tu na tinodo ni natorop. Alai adong ma tarhurung uju i sada halak parjahat na sumalin na margoar si Barrabas. Jadi di na pungu i nasida, didok si Latus ma tu nasida: “Ise do dipangido hamu paluaonku, si Barrabas manang na targoar Kristus?” Alai sai disoso i angka sintua ni malim rap dohot sintua ni bangso i natorop, asa dipangido nasida, malua si Barrabas, alai pusaon do anggo Jesus. Dungi ninna panguhum i ma mandok nasida: “Ise sian na dua i dipangido hamu paluaonku?” Dungi didok nasida ma:

***H : “Si Barrabas!”***

U : Dungi didok si Latus ma tu nasida: “Antong aha ma bahenonku tu Jesus, na targoar Kristus?” Gabe saluhut nasida mandok:

***H : Parsilangkon ma! Parsilangkon ma! Parsilangkon ma!***

U : Alai ninna panguhum i ma: Ai aha ma na jahat dibahen? Jadi lam gogo ma dipajoujouhon:

***H : Parsilangkon ma!, Parsilangkon ma!, Parsilangkon ma!***

U : Dungi saut ma dipalua si Barrabas. Alai anggo Jesus dilinsingi, dungi dipasahat ma asa diparsilangkon. Jadi dung diida si Judas parjehe i, na naeng hona uhum nama Jesus, disolsoli ma rohana, dipaulak ma na tolupulu rupia tu angka sintua ni malim dohot tu sintua ni bangso i, ninna: ***“Sala do ahu, hujehon do hape na so marpipot!”*** Alai didok nasida ma: “Ndang ro di hami! Ho do na sari disi!” Jadi ditimpalhon ma perak i tu bagasan joro i, laos sumurut sian i laho maningkot. Alai dibuat sintua ni malim ma hepeng i, ninna ma ***“Ndang jadi padomuon i tu arta ni joro, ai tuhor ni mudar do i!”*** Jadi mardos ni roha nasida manuhorhonsa tu ladang ni pande hudon, bahen parbandaan ni halak dagang. Ala ni i umbahen margoar i ladang mudar ro di sadari on. Jadi didok si Latus ma tu nasida: “Ida hamu ma jolma i?” Asa dung di ida Sintua ni malim dohot angka naposo Ibana, dijouhon nasida ma: Parsilanghon, parsilanghon ma Ibana! Dung i didok si Latus ma tu nasida: “Boan hamu ma Ibana, parsilanghon hamu ma; ai dang jumpang ahu salaNa.” Gabe dialusi angka Jahudi ma Ibana ninna ma: Marguru tu patik nami, ingkon marutang hosa Ibana dibahen do diriNa Anak ni Debata. Umbege i si Latus lam ganda ma biarna. Dung i diulahi muse tu kantorna, didok ma tu Jesus: “Sian dia do Ho?” Alai ndang dialusi Jesus Ibana. Dung i didok si Latus ma tu Ibana: “Ndang angkupanMu ahu manghatai? Nandang diboto Ho, marhuaso do ahu paluahon Ho jala marhuaso parsilanghon Ho?” Jadi dialusi Jesus ma: “Ndang adong huasom mangago Ahu, aut unang dilehon i tu ho sian ginjang. Dibahen i gumodang do dosa ni na pasahathon Ahu tu ho.” Jadi olat ni i ma dilului si Latus dalan paluahon Ibana. Alai manjujui ma angka Jahudi, ninna do: “Molo dipalua Ho do on, ndang aleale ni Kesar ho! Ai na mangalo Kesar i do ganup na mambahen dirina gabe Raja.” Asa dung dibege si Latus hata i. Ditogihon ma Jesus haruar, laos hundul Ibana di habangsa paruhuman i, na di inganan na margoar: Pantar Batu, (Gabbata didok anggo di hata Heber). Ima na masa di ari parhobasan Paska i, mareak hos ni ari. Dung i didok ma tu angka Jahudi: “Ida hamu ma Rajamuna!” Alai digogohon nasida manjouhon: “Padao, padao ma i, parsilanghon ma Ibana!” Dung i didok si Latus ma tu nasida: “Parsilanghononku ma Raja muna?” Jadi dialusi angka Sintua ni malim i ma: “Ndang adong Raja nami dungkon ni kesar i!” Asa dung di ida si

Latus, na so marguna hatana, lam ganda tahe gaorna, dibuat ma aek mamuri tanganna di jolo ni natorop i, huhut mandok: “Lias do ahu sian mudar ni on! Hamu do na sari disi!” Dung i ninna sude natorop i ma: “Marsapata tu hami dohot tu ianakhon nami ma mudarNa i.” Dung i saut ma dipalua si Barabas. Alai anggo Jesus dilingsingi, dung i dipasahat ma, asa diparsilanghon.

**4. Koor :**

**5. Marende, No. 171 : 1-2 “Tandai ma ahu”**

- ✠ *Tandai ma ahu, sungkapi ma dohot rohangku. Uji ma au, pamanat huhut ma langkangku. Ala AnakMu ma i Debata.*
- ✠ *Asi ma rohaM taringot tu pangalahongku. Olo tutu, jotjot do na lilu dalanku. Sesa dosangku sude, Debata.*

**6. Koor :**

**7. Marende, No. 412: 1 “Ndi dolok adu i”**

- ✠ *Ndi di dolok adui silang ni Tuhan i, sap mudar, sap tijur do i. Jesus mate disi, asa malum dibaen sude angka gondok roha i. Dibaen i tung holong rohangki, mida silang di Golgata i. Hupasolhot diringku tusi, dompak surgo pardalananki.*

**8. Jamita :**

**9. Marende, No. 86: 1- “Silang na badia i”  
(Pelea)**

- ✠ *Silang na badia i, Ho ma lombulombangki. Maralohon dosa i dohot pandelea i. Di sude sitaonon i, Ho ma lombulombangki.*
- ✠ *Nasa na huula i, ndang tau hasonanganki. Nang ringkot pe rohangki, pola ro nang ilungki. Holan asi si rohaM, pangurupi o Tuhan.*
- ✠ *Ro do au nuaeng tu Ho, sai palambas ma rohaM. Nunga pola mate Ho, ala asi ni rohaM. Jangkon au na dangol on, sai ulosi tondingkon.*

**10. Panutup: Tangiang & Pasupasu. (Amen, Amen, Amen)**

---

**SELAMAT PASSION MA DI HITA SALUHUTNA**